

廣西通志

十

廣西人民出版社

广 西 通 志

十

〔清〕 谢 启 昆 修
胡 虔 纂

广西师范大学历史系
中国历史文献研究室 点校

广西人民出版社

广西通志卷二百四十三

宦绩录三

潘 美	尹崇珂（李神佑）	王 明
王继勋	叶继能	蒙延永（子少连）
杨居政	柳 开	范 旻
侯仁宝	洪 湛	胡 则
郎 简	宋师虞	张从吉
魏 瑾	曹克明	余 傅
周辅成	孙 抗	苏 绅
冯仲己	梅 摯	杜 杞
郑 治	陶 弼（蒋偕）	卢 革
萧 固	徐 的	孔宗旦
张 立	张 拱	孙 沔
狄 青	孙 节	吕 琦
贾 逵	刘 几	张 玉

宋

潘 美，字仲询，大名人。开宝三年，征岭南，以美为行营诸军都部署、朗州团练使，尹崇珂副之。进克富州，①遣将率众万余来援，遇战，大破之，遂克贺州。十月，又下昭、桂、连三州，西江诸州以次降。进次韶州。韶，广之北门也，贼众十余万聚焉。美挥兵进乘之，韶州遂拔，斩获

数万计。张穷蹙，四年二月，遣其臣王珪诣军门求通好，又遣其左仆射萧灌、中书舍人卓惟休奉表乞降。②美因谕以上意，以为彼能战则与之战，不能战则劝之守，不能守则谕之降，不能降则死，不能死则亡，非此五者他不得受。美即令殿直冉彦袞部送灌等赴阙。张复遣其弟保兴率众拒战，美即率厉士卒倍道趋栅头，距广州百二十里。张兵十五万依山谷坚壁以待，美因筑垒休士，与诸将计曰：“彼编竹木为栅，若攻之以火，彼必溃乱。因以锐师夹击之，万全策也。”遂分遣丁夫数千人，人持二炬，间道造其栅。及夜，万炬俱发，会天大风，火势甚炽。张众惊扰来犯，美挥兵急击之，张众大败，斩数万计。长驱至广州，张尽焚其府库。遂克之，擒张送京师，露布以闻。即日命美与尹崇珂同知广州兼市舶使。五月，拜山南东道节度。五年，③兼岭南道转运使。土豪周思琼聚众负海为乱，美讨平之。岭表遂安。（《宋史·潘美传》）

尹崇珂，秦州天水人。乾德中，征岭表，以崇珂为行营马步军副都署。克广州，擒刘铨，即日诏与潘美同知广州兼市舶转运等使，录功迁保信军节度。未几，南汉开府乐范、容州都指挥使邓存忠、韶州贼帅周思琼、春恩道都指挥使麦汉琼等据五州之地以叛。崇珂讨之，太祖遣中使李神佑督战，数月，尽平其党，还治所。六年卒。（《宋史·尹崇珂传》）

王明，字如晦，大名成安人。开宝三年，大举南征，以明为随军转运使。山路险绝，舟车不通，但以丁壮数万人转递，供亿不缺。每下一郡一城，必先保其簿书，守其仓库。既而贺州未下，明与主帅计曰：“当急取之，恐援兵至，我师胜负未可知。”诸将颇犹豫。明乃擐甲胄，率所部

护送輜重卒百人，拥丁夫数千，畚鍤皆作，堙其堑，直抵城
门。城中惧，开门纳款，遂据有之。广州平，为本道转运
使。俄以潘美、尹崇珂为岭南转运使，以明为副使。明遍历
部内，视民疾苦，旧无名科敛，悉条奏除之，岭表遂安。七
年，代归。（《宋史·王明传》）

王继勋，陕州平陆人。王师南伐，以继勋为贺州道行营
马步军都监。有武勇，在军阵常用铁鞭、铁槊、铁挝，军中
目为王三铁。（《宋史·王继勋传》）

叶继能，全州刺史，权知桂州。从潘美下昭、桂二州，
有功。（《文载》）

许仲宣，字希粲，青州人。开宝中广南转运使。会征交
州，其地炎瘴，士卒死者十二三，大将孙全兴等失律，仲宣
因奏罢其兵。不待报，即以兵分屯诸州。开库赏赐，草檄书
以谕交州，交州即送款内附，遣使修贡。仲宣复上章待罪，
帝嘉之。（《宋史·许仲宣传》）

蒙延永，长沙人。五代末知宾州。宋初，以捍贼死节。
子少连，补左班殿直，以邕州功加殿前承旨。出使于宾，因
居焉（《文载》）

杨居政，开宝中知宾州。始创治廨，筑城以卫居民。前
守蒙延永为贼所害，居政抚其二子，买田宅以贍之（同上）

柳开，字仲涂，大名人。雍熙中为崇仪使，知宁远
军，徙全州。全西延峒有粟氏，④聚族五百余人，常钞劫民
口粮畜。开为作衣带布帽，选牙吏勇辩者得三辈，使入谕之
曰：“尔能归我，即有厚赏，给田为屋处之。不然，发兵深
入，灭尔类矣。”粟氏惧，留二吏为质，率其酋四人，与一
吏偕来。开厚其犒赐，吏民争以鼓吹饮之。居数日，遣还，
如期携老幼悉至。开即赋其居业，作《时鉴》一篇，刻石戒

之。遣其酋入朝，授本州上佐。赐开钱三十万。淳化初，移知桂州。初，开在全州，有卒讼开，开即杖背黥面送阙下。有司言卒罪不及徒，召开下御史狱，黜为复州团练副使。（《宋史·柳开传》）开于全之城北选泉石之胜，筑室山椒，率士人讲读其间。邦人名其山曰柳山，以志遗爱云。（《文载》）

边 珣，字待价，华州郑人。太宗即位，充广南转运使。初至，桂州守张頌卒。頌，潍州人，槁葬城外。旧制不许以族行，仆人乃分匿其家财，珣召官吏悉追取之，部送其柩归潍州。又属郡守与护军有忿隙者，但奏令易地，不致之于罪衅。太平兴国五年，代归。拜右谏议大夫。（《宋史·边珣传》）

范 旻，字贵参，大名宗城人。岭南平，知邕州兼水陆转运使。俗好淫祀，轻医药，重鬼神，旻下令禁之，且割己奉市药以给病者，愈者千计，复以方书刻石置厅壁，民感化之。会南汉知广州官邓存忠劫土人二万众，攻州城七十余日。旻屡出亲战，矢集于胸，犹激励将卒殊死战，贼遂少却。病创日笃，坚壁固守，遣使十五辈求援。广州救兵至，围解，赐玺书奖之。旻病甚，诏令有司以肩舆载归阙下。疾愈，通判镇州。有《邕管记》三卷。（《宋史·范质传》）

侯仁宝，汾州平遥人。太宗时，以荫迁太子中允，即赵普妹婿。卢多逊与普有隙，普罢相，即以仁宝知邕州。州之右江生毒药树，宣化县人尝采货之。仁宝以闻，诏尽伐去。九年不代。太平兴国中，上言陈取交州之策，遂以仁宝为交州水陆计度转运使。前军发，遇贼锋甚盛，援兵不继，遇害死江中。特赠工部侍郎，录其子。（《宋史·侯益传》）

洪 湛，字惟清，升州上元人。端拱初，伏阁请立许王

元禧为储贰。太宗怒，出知容州。容有戍卒谋窃发者，湛侦知，亟斩之。迁比部员外郎。（《宋史·洪湛传》）

恭 辅，咸平中判龚州。政尚恺弟，民孚政肃，绰有古风。（《文载》）

胡 则，字子正，婺州永康人。广西路转运使。按宜州，重辟十九人，为辨活者九人。（《宋史·胡则传》）

郎 简，字叔廉，杭州临安人。真宗时，知藤州，兴学养士，一变其俗，藤自是始有举进士者。（《宋史·郎简传》）

宋师离。咸平初，罗蛮率众内寇，据土堡寨，易其额曰贡州。师离领兵戡定，不逾月而俘馘无遗类。上其功，辟知宜山，再迁知宜州，四境安堵。（《文载》）

陈尧叟，字唐夫，阆州阆中人。广南西路转运使。岭南风俗，病者祷神不服药。尧叟有《集验方》，刻石桂州驿。又以地气蒸暑，为植树凿井，每二三十里置亭舍，具饮器，人免渴死。会加恩黎桓，为交州国信使。初，将命者必获赠遗数千缗，桓责赋敛于民，往往断其手及足。尧叟知之，遂奏召桓子，授以朝命，而却其私觐。又桓界先有亡命来奔者，多匿不遣，因是海贼频年入寇。尧叟悉捕亡命归桓，桓感恩，并捕海贼为谢。先是，岁调雷、化、高、藤、容、白诸州兵，使辇军粮给琼州。其兵不习水利，率多沉溺，咸苦之。海北岸有递角场，正与琼对，伺风便一日可达，与雷、化、高、太平四州地水路接近。尧叟因规度移四州民租米输于场，第令琼州遣蛋兵具舟自取，人以为便。咸平初，诏诸路课民种桑枣。尧叟上言曰：“臣所部诸州，土风本异，田多山石，地少桑蚕。昔云入蚕之绵，谅非五岭之俗，度其所产，恐在安南。今其民除耕水田外，地利之博者惟麻苧尔。”

所种与桑柘不殊，既成宿根，旋擢新干，俟枝叶裁茂则刈获之，周岁之间三收其苧。复一固其本，十年不衰。始离田畴，即可纺织。然布之出，每端止售百钱，盖织者众、市者少，故地有遗利，民艰资金。臣以为国家军须所急，布帛为先，因劝谕部民广植麻苧，⑤以钱盐折变收市之，⑥未及二年，已得三十七万余匹。自朝廷克平交、广，布帛之供，岁止及万，较今所得，何止十倍。今树艺之民，相率竞劝，杼轴之功，日以滋广。欲望自今许以所种麻苧顷亩，折桑枣之数，诸县令佐依例书历为课，民以布赴官卖者，免其算税。如此，则布帛上供，泉货下流，公私交济，其利甚博。”诏从之。代还。未几，会抚水蛮酋蒙令国杀使臣骚动，命尧叟为广南东、西两路安抚使，赐金紫遣之。事平，迁兵部。（《宋史·陈尧叟传》）

张从吉，青州临朐人。以荫补殿直，转供奉官，知宜州，屡破溪蛮。转运使尧叟上其状，累迁内殿崇班、阁门祗候。在任凡八年，代还。景德四年，宜州军校陈进叛，命副曹利用为广南东、西路安抚使，将兵讨之。次象州大乌寨，⑦与贼战，进为先锋郭志言所刺，遂入城，斩首六十级。以平贼功，改庄宅副使。未还，卒。（《宋史·张平传》）

魏 瓘，字用之。提点广南西路刑狱。邕州僚户缘逋负没妇女为佣者一千余人，悉奏还其家。就除转运使。减柳州无名役四百人。召权度支判官。寻以罪降。（《宋史·魏瓘传》）

曹克明，字尧卿，雅州百丈人。景德中，知邕州。左、右江蛮洞三十六，克明召其酋长，谕以恩信，是岁承天节相率来集。克明慰拊，出衣服遗之，感泣而去。独如洪洞恃险不至，克明谕两江防遏使黄众盈引兵攻之，斩其首领陆木

前，梟于市。宜州澄海军校陈进反。时郁江暴涨，州城摧圯，克明率丁夫伐木为连舫，⑧维之水上，状如郛郭。又多旗帜，浮巨筏，陈兵其上，为守御备。募溪峒兵三千，而黄众盈亦济兵千五百，将趣象州。会安抚使曹利用约克明会兵，行次贵州，遇贼，大败之，斩首四百余级。贼平，代还。抚水蛮叛，为宣、融、桂、昭、柳、象、邕、钦、廉、白十州都巡检使兼安抚使。既至，蛮酋献药一器，曰溪峒药，药箭中人，以是解之可不死，克明曰：“何以验之？”曰：“请试以鸡犬。”克明曰：“当试以人。”乃取药箭刺酋股而饮以药，即死。群蛮惭惧而去。是年冬，安抚都监王文庆、马玉出天河寨东，克明与中人杨守珍出环州樟岭西，磴道危绝，林木深阻，蛮多伏弩以待。玉所向力战，屡败蛮军。是时朝廷意在招附，数诏谕克明，克明亦惮深入，屡移文止玉。玉至如门团，为蛮所扼，不得进。克明迁延顾望，月余，乃至抚水州，与知州蒙承贵等约盟而还。溪峒公事，始置溪峒司。又奏阅广南两路土军为忠敢军。州人覆茅为屋，岁多火，克明选北军教以陶瓦，又激江水入城，以防火灾。代还，知滁州，徙鼎州。会交趾李公蕴寇邕州，以文思使复知邕州。既至，遣人入交趾谕以利害，公蕴拜表谢罪。迁西上阁门使，历知登、舒、邵三州。（《宋史·曹克明传》）

曹利用，字用之，赵州宁晋人。祥符中，刘永规知宜州，取下残酷，军校乘众怨，杀永规叛，陷柳城县，围象州，分兵掠广州，岭南骚动。帝谓辅臣曰⑨：“向者司天占候当用兵，朕固忧远方守将非其人，以起边衅，今果然。曹利用晓方略，尽心于事，其以为广南安抚使。”利用至岭外，遇贼武仙县。⑩贼持健鏐，蒙采盾，衣甲坚利，锋镝不

能入。利用使士持巨斧长刀破盾，遂斩首以殉。岭南平，迁引进使。（《宋史·曹利用传》）

余 傅，字亚夫，莆田人。天禧二年知北流县。兴学校，建桥梁，士民德之。（《文载》）

周辅成，道州人。敦颐父也。大中祥符进士，授贺州桂岭令。有惠政，与程珣同时，后人侈为盛事，称周程四贤一堂会晤云。

孙 抗，字和叔，天圣间知浔州。浔人未知学，乃改作庙学，召吏民子弟之秀者，亲为据按讲说。未几，旁州士皆来学，学者由此遂多。后除广西转运使。侂智高反，天子出大臣部诸将兵数万击之。抗驱散亡残败之吏转刍米于惶扰卒急之间，又以余力督守吏治城堞，修器械，属州多完，师以有功。（《俱同上》）

萧定基，字守一，吉水人。累官侍御史。宜州蛮为寇，以定基为安抚使。定基驰至，问所以反故，遣兵守要害，戒诸将毋妄击。蛮遂遁。仁宗曰：“边臣好生事，定基乃能如是。”召还，除淮浙荆湖制置发运副使。（《金志》）

苏 绅，字仪甫，晋江人。安化蛮蒙光月率众寇宜州，败官军，杀钤辖张怀志等六人。绅上言曰：“国家比以西北二边为意，而鲜复留意南方，故有今日之患，诚不可不虑也。臣顷从事宜州，粗知本末。安化地辐员数百里，持兵之众，不过三四千人。然而敢肆侵扰，非特恃其险绝，亦由往者守将失计，而国家姑息之太过也。向闻宜州吏民言，祥符中蛮人骚动，朝廷兴兵讨伐。是时，唯安抚都监马玉勒兵深入，多所杀获。知桂州曹克明害其功，累移文止之，故玉志不得逞。蛮人畏伏其名，至今言者犹惜之。使当时领兵者皆如玉，则蛮当殄灭，无今日之患矣。至使乘隙蹂边，屠杀将

吏，其损国威，无甚于此。朝廷倘不以此时加兵，则无以创艾将来，而震垒荒裔。彼六臣者，虽不善为馭，自致丧败，然衔冤负耻，当有以刷除。臣观蛮情，所恃者地形险厄，据高临下，大军难以并进。然其壤土硗确，资蓄虚乏，刀耕火种，以为饿粮。其势可以缓图，不可以速取；可以计覆，不可以力争。今广东西教阅忠敢澄海、湖南北雄武等军，皆惯涉险阻，又所习兵器，与蛮人略同。请速发诣宜州策应，而以他兵代之。仍命转运使备数年军食，今秋、冬之交，岚气已息，进军据其出路，转粟补卒，为旷日持久之计。伺得便利，即图深入，可以倾荡巢穴，杜绝蹊径。纵使奔迸林莽，亦且坏其室庐，焚其积聚，使进无钞略之获，退无攻守之备。然后谕以国恩，许以送款，而徙之内郡，收其土地，募民耕种，异时足以拓外夷为屏蔽也。仍诏旁近诸蛮，谕以朝廷讨叛之意，毋得相为声援，如获首级，即优赏以金帛。计若出此，则不越一年，逆寇必就殄灭。况广西溪峒，荆湖、川峡蛮落甚多，大抵好为骚动。因此一役，必皆震聒，可保数十年无俶扰之虞矣。”朝廷施用其策，遣冯仲己守桂州经制之，蛮遂平。（《宋史·苏绅传》）

冯仲己，字齐贤，桂州兵马都监，俞献可荐知宜州。天圣中，改桂、宜、融、柳、象沿边兵马都监，遂专溪峒事。以礼宾使复知宜州。代还，道改供备库使，知邕州。治舍有井，相传不敢饮，饮辄死。仲己日汲自供，①终无恙。旁城数里有金花木，土俗言花开即瘴起，人不敢近。仲己故以花盛时酣燕其下，亦复无害。明道恭谢，改东染院使，领荣州刺史、梓夔路兵马钤辖，迁洛苑使、知桂州兼广西钤辖。道江陵，会安化蛮犯边，官军不利，仁宗遣中使趣仲己讨之。仲己日夜疾驰至宜州，缮器甲，募丁壮，转粮餉，由三路以

进。伸已临军，单骑出阵，语酋豪曰：“朝廷抚汝甚厚，汝乃自取灭亡耶！今我奉天子命来，汝听吾言则生，不则无噍类矣。”众仰泣罗拜曰：“不图今日再见冯公也。”明日，蛮渠弃兵械率众降军门。初，部卒以覆将畏匿，伸已曰：“纪律不明，主将也，战士何罪？”请于朝，贷其死。以劳迁西上阁门使、知宜州。乐善蛮寇武阳，伸已遣谕祸福，蛮大悦，悉还所掠。又莫世堪负险强黠，抄掠边户，为疆场患。伸已设伏擒捕，皆置于法。迁果州团练使。（《宋史·冯拯传》）

梅 摯，字公仪，成都新繁人。知蓝田上元县，徙知昭州。（《宋史·梅摯传》）文章政事，绰然有声。时官广南者，多惮岚瘴，不愿往。摯作《五瘴说》镌于石，谓“仕者宜先除其身瘴，而勿病于土瘴，则逆气不干，虽荒远无害。”以示劝焉。（《金志》）

梁 适，字仲贤，东平人。知梧州，奏罢南汉时民间折税。（《宋史·梁适传》）

杜 杞，字伟长，无锡人。（《文载》）尚书虞部员外郎、知横州。时安化蛮寇边，杀知宜州王世宁，杞出兵讨之。杞言：“岭南诸郡，无城郭甲兵之备，牧守非才。横为邕、钦、廉三郡咽喉，地势险阻，可屯兵为援。邕管内制广源，外控交趾，愿择文臣识权变练达岭外事者，以为牧守，使经制边事。”历京西转运、按察使。会区希范诱白崖山蛮蒙赶反，有众数千，袭破坏州、带溪普义镇宁寨，岭外骚然。擢杞广南西路转运按察安抚使。行次真州，先遣急递以书谕蛮，听其自新。次宜州，蛮无至者。杞得州校，出狱囚，脱其械，使入峒说贼，不听。乃勒兵攻破白崖、黄泥、九居山寨及五峒，焚毁积聚，斩首百余级，复环州。贼散

走，希范走荔波峒，杞遣使诱之，赶来降。⑫杞谓将佐曰：“贼以穷蹙降我，威不足制则恩不能怀，所以数叛，不如尽杀之。”乃击牛马，⑬为曼陀罗酒，大会环州，伏兵发，诛七十余。后三日，又得希范，醢之以遗诸蛮。御史梅挚劾杞杀降失信，诏戒谕之，迁两浙转运使。（《宋史·杜杞传》）

郑 诒，字正臣，德安人。景佑四年进士。以南康县移知梧州。时依智高为乱，吏多避匿不即往。诒独亟往，治城堑，集吏民以守，而州无事。经略使举以知宾州，再迁至太常博士而归。自养俭约，自宾州归，所赍无南方一物。（宋王安石《郑君墓表》）

陶 弼，字商翁，永州人。庆历中阳朔主簿。时依智高犯南海，杨敞为安抚使，辟参军谋。使下英江。会诸将议击，未至，智高解去。弼舍舟，从其徒数十人，间关步出赴敞。次临贺，大将蒋偕适战死，余众畏亡将被诛，多降贼。弼数与之遇，亟矫敞命揭榜道上，谕使归，许以不死，凡得千五百人。事罢，⑭调阳朔令。课民植木官道旁，夹数百里，自是行者无夏秋暑暍之苦，他郡县悉效之。摄兴安令。移书说桂守萧固浚灵渠以通漕，不听；至李师中，卒浚之。师征安南，馈餉于是乎出，大为民利。知邕州。邕经依寇，井遂荡然，人不乐其生。弼绥辑惠养，至忘其勤。诸峒献土物求内附，弼降意抚答，谢其贽，皆感悦无犯边者。邕地卑下，水易集，夏大雨弥月，弼登城以望，三边皆漫为陂泽，亟窒垠江三门，谕兵民即高避害。俄而水大至，弼身先版锸，召僚吏赋役，为土囊千余置道上，水果从窾入，随塞之。城虽不坏，而人皆乏食，则为发廩以振于内，方舟以饁于外。水不及女墙者三板，旬有五日乃退，公私一无所失亡。自横、

浔以东数州皆没。弼久于邕，请便郡徙鼎州。郭逵南征，转弼康州团练使，复知邕州。民再罹祸乱，散匿山谷，弼率百骑深入左江峒，民知其至，扶老携幼以归。逵帅官军临富良江，使弼殿。交人纳款，逵欲班师，恐为所袭。乃以计夜起，军不整，骑步相踏藉乱行。贼隔江阴伺覘，知弼殿，弗敢追。弼申令帐下毋动。迟明，结队徐行，逵赖以善还。建所得广源峒为顺州，枕榔为县。进弼西上阁门使，留知顺州。州去邕二千里，多毒草瘴雾，戍卒死者什七八，弼亦疾甚，然蚤暮劳军，视其良苦，意气激扬，士莫不感泣，强奋起为用。交人袭取枕榔，扬声欲图州，独难弼素得人心，贼动息皆先知。获间谍不杀，谕以逆顺，纵之去，恩威两施，所是终弼在不敢犯。加东上阁门使，未拜而卒。诏录其家五人。弼能为诗，好士乐施，所得俸禄，悉以与人，家至贫不恤也。既死，妻在乡里，僦屋以居。（《宋史·陶弼传》）

卢革，字仲辛，湖州德清人。庆历中知龚州。蛮入寇，桂管骚动，革经画军须，先事而集。移书安抚使杜杞，请治诸郡城，及易长吏之不才者。又言：“岭外小郡，合四五不当中州一大县，无城池甲兵之备，将为贼困，宜度远近并省之。”后依智高来，九郡相继不守，皆如革虑。（《宋史·卢革传》）

萧固，字干臣，新喻人。以进士累官屯田员外郎。庆历间，区希范诛，广西困于兵。诏以固治桂州，兼广西都巡检提举兵甲溪峒事。至则因其故俗，治以宽大，广西遂安。以才选为荆湖南路提点刑狱。未几，以固之信于南方也，又以为广西水陆计度转运使。方是时，依智高搜兵，诱聚中国亡命，阴以其众窥边境，而边吏士尚皆不寤。固独忧此，谓必为南方之患，⑮乃选遣才辨吏说智高内属。上书言状，请

因以一官抚之，使抗交趾，且可以纾患。书下枢密。枢密以智高故属交趾，纳之生事。诏问固能保交趾不争、智高终无为寇，则具以闻。固曰：“蛮夷视利则动。必保其往，非臣之所能。顾今中国，势未可以有事于蛮夷，则如智高者，抚之而已。且智高才武强力，非交趾所能争而蓄也。就其能争，则蛮夷方自相攻，吾乃所以间而无事。”争议至五六，不报。又奏请择将吏，缮兵械，修城郭以待变。亦至五六，又皆不报。寻以诏归，智高果反，枢密更归责于固。以知吉州，顷之复以为广东转运使。又以直昭文馆知桂州。当是时，侂宗旦聚兵智高故地，无所属。邕州为之警。诸将皆议兴师，固又独持招降之议。朝廷用其议，宗旦遂释兵服，以为西头供奉官，而边无事。（《文载》）

徐 的，字公准，建州建安人。累迁尚书员外郎，擢广南西路提点刑狱。安化蛮攻杀将吏，所部卒畏诛，欲谋叛。的驰骑至宜州，慰晓之曰：“尔曹亡惧，能出力讨贼，犹可立功以自赎。若朝叛则夕死，非计也。”众皆敛手听命。奏复澄海、忠敢军，后皆获其用。（《宋史·徐的传》）

程 珣，河南开封人。仁宗时以珣为黄陂尉，徙知龚州。时宜僚区希范既诛，乡人忽传其神降言当为我南海立祠，于是迎其神以往，至龚，珣使诘之。曰：“比过浔，浔守以为妖，投祠具江中，逆流而上，守惧，乃更致礼。”珣使复投之，顺流去，其妄乃息。（《宋史·程颢传》）

孔宗旦，鲁人，为邕州司户参军。侂智高未反时，州有白气出庭中，江水溢，宗旦以为兵象，度侂智高必反，以书告知州陈珙。珙不听。后智高破横州，即载其亲往桂州，曰：“吾有官守，不得去，无为俱死也。”既而州破被执，贼欲任以事，宗旦叱贼，且大骂，遂被害。事闻，赠太子中

允。（《宋史·孔宗旦传》）

张立，任广西都监。皇祐中，侂贼陷十二郡，据邕州，驱立，歼焉。立临刑，辞色不变。时邕州陈珙亦被执，呼智高万岁，乞哀求自效。不听，竟杀之。（《文载》）

张拱，为广西都监。侂贼围邕州，拱自宾州引兵来援。既入而城陷，拱骂，不屈死。逾月，得其尸如生。（同上）

余靖，字安道，韶州曲江人。知虔州，丁父忧去。侂智高反邕州，乘胜掠九郡，以兵围广州。朝廷方顾南事，就丧次起靖知潭州，改桂州，诏以广南西路委靖经制。智高西走邕州，靖策其必结援交趾而胁诸峒以自固，乃约李德政会兵击贼于邕州，备万人粮以待之，而诏亦给缗钱二万助德政兴师，且约贼平更赏以缗钱二万。又募侂、黄诸姓酋长，皆糜以取，使不与智高合。既而朝廷遣狄青、孙洙将兵共讨贼。青却交趾，援兵不用，贼平。就迁靖给事中。御史梁燾言赏薄，又迁尚书工部侍郎。初，青兵未至前，戒部将勿战。靖迫钤辖陈曙出斗，败走。青至，按军法斩曙及指使袁用于坐，靖瞿然起拜。及诸将班师，独留靖广西，遣人入特磨道擒智高母子弟三人，生致之阙下。加集贤院学士，徙知潭州，又徙青州。交趾蛮申绍泰寇邕州，杀五巡检。以靖安抚广西，至则召交趾用事臣费嘉祐诘问之。嘉祐至，给以近边种落相侵报，误犯官军，愿悉推治，还所掠及械罪人以自赎。靖信之，厚谢遣去，嘉祐遂归，不复出。知广州。（《宋史·余靖传》）

孙洙，字元规，越州会稽人。知秦州。时侂智高反，洙入见，帝以秦事勉之。对曰：“臣虽老，然秦州不足烦圣虑，陛下当以岭南为忧也。臣观贼势方张，官军朝夕当有败

奏。”明日，闻蒋偕死，帝谕执政曰：“南事诚如沔所料。”宰相庞籍奏遣沔行，以为湖南、江西路安抚使，以便宜从事，加广南东、西路安抚使。沔请益发骑兵，且增选偏裨二十八人，求武库精甲五千。参知政事梁适折之曰：“毋张皇！”沔曰：“前日惟亡备，故至此。今指期灭贼，非可以侥幸胜，乃欲示镇静邪？夫实备不至而貌为镇静，危亡之道也。”居二日，促行，才与兵七百。沔忧贼度岭而北，乃檄湖南、北曰：“大兵且至，其缮治营垒，多具宴犒。”贼疑不敢北侵。会遣狄青为宣抚使，沔与青会。青与智高遇，战归仁铺，智高败走。青还，沔留治后事，迁给事中。及还，帝问劳，解御带赐之。（《宋史·孙沔传》）

狄青，字汉臣，汾州西河人。皇祐中，广源州蛮依智高反，陷邕州，又破沿江九州，围广州，岭外骚动。杨敞等安抚经制蛮事，师久无功。又命孙沔、余靖为安抚使讨贼，仁宗犹以为忧。青上表请行，翌日入对，自言：“臣起行伍，非战伐无以报国。愿得蕃落骑数百，益以禁兵，羁贼首致阙下。”帝壮其言，遂除宣徽南院使、宣抚荆湖南北路、经制广南盗贼事，置酒垂拱殿以遣之。时智高还据邕州，青合孙沔、余靖兵次宾州。先是，蒋偕、张忠皆轻敌败死，军声大沮。青戒诸将毋妄与贼斗，听吾所为。广西钤辖陈曙乘青未至，辄以步卒八千犯贼，溃于昆仑关，殿直袁用等皆遁。青曰：“令之不齐，兵所以败。”晨会诸将堂上，揖曙起，并召用等三十人，按以败亡状，驱出军门斩之。沔、靖相顾愕眙，诸将股栗。已而顿甲，令军中休十日。觐者还，以为军未即进。青明日乃整军骑，一昼夜绝昆仑关，出归仁铺为阵。贼既失险，悉出逆战。前锋孙节搏贼死山下，贼气锐甚，沔等惧失色。青执白旗麾骑兵，纵左右翼，出贼不